



Mèt in dees edisie:

- Proklamasie Prins Bart 1
- Proklamasie Jeugdprins Michael 1 & Jeugdprinses Fleur 1
- Verhoës containerpark zörgtj veur stress
- Radio Monza geit veur wè-reldjrekord radio make!
- Gei zwart geldj biëj KFC Kinder!
- Euvername Café 't Rôndj Puntj zoë good es rôndj
- Opnoëw doupingsjandaal in Kinderse Kèrmiskoers!
- Quiz me Quix
- Project X Kinder mislôktj volledig door taamheid Kinderse jeugd!
- Fritchinees Kinder goodge-keurdj!
- ... en nog veul miër sjëele zeiver ...

Weurdje vanne Vorst

Het is 2013 en det kumptj nao 2012. Det wiltj dus ouch zègge det diëj Maya's eine kemel hōbbe gesjote van jewelste! Zoë zuuse mer: het is noëts veurbiëj totdet het vèt vrouwmīns zingtj! (Kwoot is gepiktj van ein of angere Ingelsman, ich hōb zeker niks tege de get gezat-tere carnavaliste ōnger uch! ;))

Mer good det de wèereldj neet is vergaon, anders haaje wèe al diëj prachtige carnavalsmomente van de lèste wèeke mōtte misse. Den 11dje november waas al sijk, mèt good wèer, veul ambiance en eine lèeg gegèete fritwage op het inj. Mer de Prinsezitting diëj weer poëpdrōk waas, het prachtige Kinjerbal en ouch het Prinsebal: het waas super!

En, bèste Kinderse minse, het is nog neet veurbiëj! Kōmendje daag stuit Kinder weer in het teiken vanne carnaval. Stōm ugge radio aaf op 106.5 FM op dōnderdig, want tōsse 16 en 22 oor geit dao weer de dialectoëtzending vanne Rabbedabbers de locht in. Gèe zeetj trouwes altiëd welkōm inne kantien van Monza!

Op zōndig 10 fibrewariëj trèktj alweer de stoet door de Kinderse straote, en det is toch veur veul minse den daag biëj oëtstek ōm ins gek te doon en get slōk te goëje of te rape! Achteraaf nateurlik weer eederein present inne zaal, want wèe gaon dao ouch nog ei fiëstje boewe! Aafsloëte doon wèe op maandig mèt ōs verklèdj bal, ouch weer inne fanfarezaal. Eederein welkōm en... den inkōm is gratis!

Ich wins ten slotte eederein van Kinder, of desse noë carnavalist bès of neet, prachtige daag! Ouch aan ōs kammerōej oët de hiël fusie: maak ter ei prachtig fiëst van en vergèet zeker neet te geneete van eeder mōment!

Dank aan eederein dèe aan dees gezèt heet mètgewirtj. In 't bezun-ger Marc Meurs veur zien grafische kwaliteite en Jaak Jacobs veur ziëj geveul veur joernalistiek.

*Rabbedabbers Alaaf!
Kinder Alaaf!*

Jeugdprins Michael I en jeugdprinses Fleur I Prins Bart I en prinses Yolanda I



Proklamasie PRINS BART I

Mèt de grasiej vanne Veurzitter en miène veurgaondje Prins, mèt de zèege vanne aoj-prinse verklaor ich hiejbiej vandaag mièn èllef punte.

Ten ièste :

Ich, Bart Vanderstegen, bèn vandaag zoë fier es eine geeter. Want ich maag uch vertèlle det ich dit jaor door het lèeve kan gaon es 36e groëte prins vanne Rabbedabbers van Kinder es : Prins Bart den 1e !

Ten twiëdje :

Dao hiltj het gelök neet op, want mien leef vriendin geit dit jaor mèt mich mèt belèeve es: Prinses Yolanda de 1e!

Ten dördje :

Mèt mer 5 wèeke tot aane stoet stuit er een kort mer krachtig seizoen op òs te wachte.
Dus carnavaliste van Kinder houdj uch mer klaor, want es Prins lèg ich tot den daag vanne stoet beslaag op al uch aovendje en nachte!

Ten veerdje :

Op 26 janewariëj gèef ich mièn groët Prinsebal oppe Bèlestraot inne sjöttebarak.
Danse, springe, fiëste en drinke a volonté, en det zônger buks inne nak!

Ten viëfdje :

Miène kammejao van Hellings zal ich de kômendje wèeke inne graasj laote staon.
Den hób ich tiëd genôg òm vollen trèk met de Rabbedabbers op stap te gaon!

Ten zèsdje :

Zjust de wèek veur de stoet hool ich hum regelmaotig van stal,
Want den bring ich aardig get slök en kermèlle nao miène Prinsewage inne hal!

Ten zeevendje :

Mèt de KDR-crew hób ich vanzèlèeve al hiël get wagens gemaaktj en hóbbe wèe prachtige tiëje achter de rök.
Ich wil den ouch eederein van toen oprope òm nog ins vollebak mèt te kôme fiëste, wèe hole diëj gouwe jaore trök!

Ten achtste :

De Noordhook mèt mièn Sevesstraot is de Prinsewiëk dit jaor, en doa stiktj het van échte carnavalsminse.
Ôm in zoë ein buurt op te kinne greuje is super, miër kintj eine Prins zich neet winse!



Ten neegendje :

Vreuger waas ich crosser, sprông ich met den tuf euver huip en goof ich gaas wiëj eine echte vent.
Mer noë ben ich Prins, spring ich int rëndj wiëj eine knien en trèk ich polonaises door eeder tent!

Ten tiëndje :

Alken-Maes, Inbev, Martens oët Bôgget, het kumtj allemaol neet zoë nauw en ich zal ter waal aan winne.
Allein mèt Hollands beer môtj gèe mich neet aafkôme, dao gaon wèe neet aan beginne!

Ten ellefdje :

De noëwe burgemeister is pas 10 daag aane gang en heet vanaaf noë al niks miër te zègge.
Want es Prins bèn ich dit jaor baas in Kinder, det hoof ich neemes oët te lègge!

Mièn leuze veur dit jaor zal den auch zeen :

**Zörg dit jaor mer altiëd det gèe
eueveral dao zeetj es ièste
Want mèt Prins Bart de 1e gaon
wèe fiëste wie de biëste !**

Gedaon te Kinder inne sporthal oppe 36e prinsezitting van 12 janewariej 2013 door ugge 36e groëte prins van de Rabbedabbers van Kinder, Graaf van de Sevensstraot, Hertog van 't Dörp, Baron van kammejonèt tot kammejao,
Ugge euevergelökkige prins Bart de 1e

Proklamasie MICHAEL I & FLEUR I

Ten lêste:

Ich bèn Michael van Acht, zoon van Yvonne Olefs en Maurice van Acht. Ich hōb ouch ei zōster: Stephanie.
Mer vanaaf vandaag maag eederein mich aansprèeke es Jeugdprins Michèel den 1e!

Ten Twièdje:

En ich bèn Fleur Maessen, dochter van Sandra Horsmans en Maurice Maessen. Mièn zōster hètj Britt.
Ouch ich bèn klaar veur ein prinselik jaor, es Jeugdprinses Fleur de 1e!

Ten Dördje:

Eine frit hōb ich gèer, det löst ich zelfs eederen daag. Allein jaomer det det van mièn oujers neet maag.
Es Jeugdprins wil ich ter waal veur gaon, det diēj paar carnivalsdaag toch eedere kiēr fritte op taofel staon!

Ten veerdje:

Veur mich haai eine frit neet gehove, es ich maag keeze stuit ter pizza in den ove!
Kwa soort lust ich alles, behalve eine mèt sproète! Es dèe oppe taofel kumptj, vluugtj ter drek boète!

Ten vièfdje:

Met ein kart vare of op ein snowboard staon, det is mièn lank lève.
Tarmac of sniëe, het maaktj neet oèt, es ich mer gaas kin gèeve!

Ten zèsdje:

Biēj Kivoc houw ich hiël get kiēr inne wèek tege eine volleybal.
Mer het twièdje weekendj van fibrewariēj môt ich passe, den ist carnaval!

Ten zeevendje:

Mèt miène Playstation 3 kin ich mich ore aan ei stök ammezere.
Den môtte ze mich mèt rōst laote, en mich veural neet ambetere!

Ten achtste:

Mièn hundje Boomerke kintj volges mich ouch ei stökske fièste.
Ich roop biēj deze hum oèt es Prinske van alle Kinderse bièste!

Ten neegendje:

Binne ein paar jaore wil ich Formule Ein piloot wèere en gaot gèe allemaol kinne supportere veur mich.
Diēj men gaon aardig get concurrensie kriege oppe circuits, det zèg ich dich!



Ten Tièndje:

Veur mich hoofdj det racen neet, ich wil hiël gèer juffrouw wèere inne sjoëwl.
Kinjer nuttige dinger lière euver vanalles en nog get, det vinj ich cool!

Ten èlfdje:

Ôos leuze veur dit jaor zal zeen:

**Wèe zeen Jeugdprins Michael en
Jeugdprinses Fleur,
Es wèe ter zeen, stuit het fièst
veur de deur!**



Verhoës containerpark zörgtj veur stress

Gelouf het of neet, mer het is crisis biëj het perseniël van het containerpark. De nakendje verhoës zörgtj veur eine houp stress biëj het noë al euverwikt perseniël. **Danny J.**, dèe verder leever anoniem bliëftj, getuogdj: “Slecht slaope en nachtmerries wore nog mer het begin. Ich bèn al 4 kiër nao **dokter Hechtermans** kinne loupe veur allerlei lichamelikke klachte. Volges mich wirkjt dèe wirkdrök noë al in op miëj liëf. Piën inne kneuk, last vanne rög, ... En ich höb nog gein doës vast gehad!!!”

Het is duidelik det dit ein minsontjierendje situasie is. Toen ôs redaksie vertrok koste wèe nog net ein glimp opvange van eine beukendje Danny J. inne kassacontainer. Ômdet wèe es Rabbedabbers hulp wille beeje in meujlikke tiëje doon wèe eine oproop aan alle carnavaliste van Kinder. Es gèe nao de stoet aane fanfarezaal zeetj, kôm den in plaats van **Frenske de pelis** get te vervèele door te lang oppe wage te bliëve staon, gewuuën den hook ôm nao den technische deenst. Pak ein doës, eine zak aafval of ein kroekèr mèst vast, en bring det alvast nao het stök grôndj langs het gemeindjehoës. De luuj van ‘t containerpark zulle uch dankbaar zeen. Ze höbbe al beloofdj te traktere naoderhandj inne zaal!



Môppe

↔ Op eine daag huërtj St. Piëter de bel vanne hemelpoort. Hèe duit ope en zuut nog zjust eine manskèerel wegloupe. Hèe sjôdj ins mèt ziene kop en duit de poort trök toe. St. Piëter is nog mer 10 stappe wiëjer es de bel alweer geit. Hèe duit opnoew ope en zuut alweer dezelfde kèerel wegloupe.

Den heilige is het meug, zetj de poort op ein kier en wuchtj aaf achter den hook. Noa ein paar tèle geit de bel trök. St. Piëter zweijt de poort ope en trèktj de kèerel biëj den erm. Het is **Mathy Kwaspén!**

St. Pieter vreugt aan Mathy: “Jông, bès dich mèt miën veut aan ‘t rammele?”

Mathy antwoordj: “Sorry, ich kin ter ouch neet aan doon. Ze zeen aan ‘t probere mich te reanimere...”

↔ **Carla en Freddy** gaon op safari. Op eine kiër staon ze oug in oug mèt eine brullendje liëuw!

Freddy reageertj snel: hèe pukt zich ein handj vol zandj, goëttj det in de ouge vanne liëuw en kruptj snel in eine boum.

Carla bliëftj röstig staon, terwiël de liëuw stillekesaan trök begintj te zeen.

Freddy reuptj van oët de boum: “Alé Carla, maak desse weg bès!”

Carla antwoordj: “Zèg Freddy, ich höb det zandj neet ge-goëdj hè!”

↔ **Thei Gitaar** kumtj strôntjzaat bjeur.

Hèe viltj veur kapot niër in zien bèd nèeve **Carine**, zien vrouw.

Hèe weurdj wakker aan de hemelpoort en St. Piëter zeet: “Thei, jong, de bès gestorve in diëne slaop.”

Thei, volledig vanne kaart, antwoordj: “Doëd? Ich kin neet doët zeen! Ich haoj teveul van het lèeve. Ich wil trök heives!”

St. Piëter zeet: “De kins allein mer trök gaon es ein hoon.”

Thei: “Zoëlang ich mer kin trök gaon nao ein boorderiëj kort bjus, is mich det good!”

Zoë gezag, zoë gedaon. Dao stuit Thei, bedèktj mèt ploeme en dabbendj inne grôndj. Eine haan kumtj korterbiëj. “Ah, dich bès diëj noëw hoon? Wiëj waas den iërste daag hiëj?”

“Neet slecht,” zeet Thei, “mer ich veul get raars in miëne boëk, zjust al gaon ich ôntploffè...”

“De bès aant ovulere,” zeet den haan. “Zèg noë neet desse dog noëts ein ei höbs gelag? Ôntspan dich, laot dich volledig gaon, det is hiëj! normaal.”

Thei loëstertj nao den haan en inkele ôngemèekelikke momente later: voila, ein ei!

Thei löptj euver van emotie en ônmiddeljik lèktj hèe nog ein twiëdje ei.

Zjust esser zich klaor meuktj veur nog ein dôrdje ei, veultj hèe eine slaag op ziene kop en huurtj ‘r Carine roope: “Thei, wèer wakker, de bès ôs hiël bèd aant vol sjiëte!!!”

↔ **Marijn Pouls** kumtj hiëj door het gek hèer bjeur. “Sjat, pak diën koffers, pak diën koffers!”

“Waat is ter den?” vreugtj **Hanne**.

“Ich höb 40 miljoen gewônne mèt de Lotto!” reuptj Marijn.

“Oh, geweldig!” zeet Hanne. “Waat môt ich pakke: zomer- of winterkleijer?”

“Meuktj neet oët,” zeet Marijn, “esse mer maaks desse weg bès!”

↔ **Lut van Eygen** ligtj biëj **tandarts Van Ende**. Ze kermtj vanne piën: “Oh, oh, ich krieg nog leever eine kleine!”

“Det kan ouch,” zeet Marc, “mer den môt de stoel anders.”

Radio Monza geit veur wèereldjrekord radio make!




Det Radio Monza neet veur eine stuntj miêr of minder ver-
lèege zijt, det wètj eederein. Het rekord stuit momenteel
op 187 oor, mer det is veur **DJ Tony** van Radio Monza gei
probleem. Hèe geit in eine kiêr veur ein forse verbèetering:
200 oor!

De veurbereidinge zeen al efkes bezig. DJ Tony sluëptj mo-
menteel mer leefst 15 oor per daag. Det is ómdet hêe den
naoderhandj get minder slaop nuêdig heet. Hêe stuit ouch
op ei dieet van zwart broêd mèt spek en eier. Sex is striktj
verbooje, dus de viagra zijt achter sloot en grendel.

Inne studio zeen al gèt aanpassinkskes gedaon óm veur ei
maksimaal comfort te zörge veur es het zoë wiêd is. De DJ-
zèetel is oëtgeróstj mèt eine volottomatische kakstool. De
veuj kinne zoë dèk es nuêdig in ei bekske mèt zaotwater
gezat. Verder zal DJ Tony gaon lèeve op ein infuus van ge-
mixtj verkesvleis, êrpel, water en sôkker. **Dokter Bullen** zal
óm de paar oor ei bezeukske gaon bringe aan Monza óm
de gezôndjheidssituasie van Tony op te volge. Óm Tony
te steune zulle ter ouch ei paar luuj mètdoon aan ziene
oëthoujingsmarathon. Monza veurzitter **Pierre Christis** en
Ben vanne Kaap gaon 200 oor aan ei stök den tap doon!
Veural Ben zuut det volledig zitte: dèe kintj waal get daag
zônger slaop.

Wêe vanne Rabbedabbers winse DJ Tony en Radio Monza
alvast veul gelök en hope det het rekord nao Kinder weurdj
gehooldj!!!





Gei zwart geldj biëj KFC Kinder!

Panorama kwaam biëj ôs eigenste KFC Kinder van ein kaal kèrmes bjeur toen ze ouch dao binnevele in heur zeuktocht nao zwart geldj inne voetbal. Inne voetbèl van KFC zaat allein mer locht.

Inne kasverslage enne bookhaojing waas niks te vinje waat ter op leek det KFC gesjoemeldj haaj. Dao waas ein klein kas mèt get extra opziëj gezat geldj gevônje, mer den oëtlèg van veurzitter **Harry Jans** det det deendj ôm aaf en toëw Vanvlijmen zien opestaondje rëekeninge biëj Rina en Riëk te betale waas veur de ôngerzoekers genôg ôm ter gei drama van te make.

Det KFC boëte sjet is gebleeve heet nateurlik te make mèt het feit det ziëj eine hiële gooje bookhaojer hōbbe dèe al det zwart geldj good wètj wit te wasse. Angers waas dèe ballon noëts opgegange! Mèr, de sjrik zitj 'r nao hiël det gedoons toch ferm in, en daoveur is ter aafgesloupe vergadering vannet besteur oët beslote ôm het aandeil zwart geldj inne wirking van KFC Kinder te gaon vermindere en te gaon zeuke nao miër inkômste in 't wit.

Oplossinge kwaame ter al snel oppe taofel! Ônger impuls van **Rudi Poelmans** zulle biëj de volgendje edisie vannet koew-sjiëte de priëze ter inkel en allein oëtgaon es de vlaai volledig in ei veerkèntje viltj. Oppe belijning tètj het neet! De vekskes wèere ouch get verkleindj, nao 50 op 50 centimèeter. Biëj ein zwaor vlaai wèere de winstkans mèt anger weurd aardig verkleindj.

In plaats van 2 of 3 kiër per jaor zal **Jaak Jacobs** vanaaf volgendj seizoen eeder toësmatsj eine aanwezigheidsbarbecue doen. Veur 5 euro 't stök kintj gèe ei lekker stökske vleis kriege. Mèt de slogan 'Lekka Lekka' zal Jaak aaf en toëw ônger de rōst en nao de matsj het volk oprope ôm get te kōme èete.



Robert Christis heet den weer ein anger gaat inne mèrret gevônje. Via ein van zien vreugere zakepartners heet hëe eine okkasie slaagboum en eine geldjottomaat oppe kop kinne tikke. Gèe veultj het al aankōme: vanaaf kōmendje maondj weurdj het betalendj parkere oppe parking van 't Hoverstadion!

Dao weurdj ouch, nèeve get sjale en stickers, geïnvesteerdj in miër prullaria veur de fens. Via de Legerstock wèere ter gooje-

koupe 'Sniekersklèkskes' ingevourdj oët China. "Eederein dèe zich ei bitje fèn van KFC Kinder sjriëftj, môt zich toch op ziëj minst zoë ei Sniekersklèkske aansjaffe," aldus **Eddy Reeskens**. Inne febrik in China wèere de klèkskes al industriëel bedoemeldj en mèt spetjes beer besprenkeldj. Nao aankōmst vanne cōntainer aane Legerstock weurdj de aafzuiging van frituur 't Hapje ein paar daag ter op aangeslote. Het resultaat is het einige echte Sniekersklèkske, vèttig en klam. Te koup veur 19 euro 't stök!



Ôm nog eine lèste financiële slaag te slaon, weurdj **Sabir Chadli** verkocht aan Chelsea.

Zoë es gèe lèestj: KFC Kinder is creatief genôg ôm ouch zōnger zwart geldj te euverlèeve in dees zwaor tiëje! Proficiat daoveur!





anktj!



THE END

Ôngerzeuk bewiëstj:



mansluuj staon miër en miër aan den aafwas

story

**Schokkend!
Tony Vanwijck
neet van de wiëk!**



sjaai mô't er zeen...



**T
H
E
E
N
D**

Rôndj Punt trök ope mèt noëwe naam?

Dao is ôs noëts aane oëre gekôme det café 't Rôndj Puntj trök ope geit. Neemes minder es Hendrik 'Veus' Neyens heet Doumen zoë wiëd gekrege det ze de heurpriës get hóbbe laote zakke. Noë, echt veul is ter neet vanne priës aafgegaon. 't Is zelfs zoë erg det Veuske gei perseniël miër kintj betale. Daorôm zou het fijn zeen es gèe efkes op veurhandj zoudj belle es gèe mèt veul volk gaotj kôme. Den kintj Kim snel de kleine nao de sjoëwnoujers bringe ôm in te springe inne zaak.



Det zou toch get zeen...
Café De Welkôm,
biëj Veuske!

Den bèn ich
Jaak veur...
Whahahaha!



Wistj gèe det ...

... aod-Prins **René 1 Segers (van 't Weefke)** veurig jaor is euverleeje. René waas, nèeve Prins in 1981, ouch ein vanne oprichters van de Kinderse Rabbedabbers en eemes dèe wèe daoveur hiël dankbaar môtte zeen. Gèe stingtj in Kinder mèt aane basis van het fiëst waat wèe noë veere. Rôst zaocht, Né.

... wèe dit jaor **Luc Walen** tot kroënridders hóbbe oetgerope! Luc is al jaorelank ein van de Rappetappers dèe blood, zweit en traone leutj ôm eeder jaor opnoëw eine prachtige wage inein te stèeke.

...ouch **Sven Beelen** zich vanaaf dit jaor kroënridders sjiëftj. Sven is ei bitje de doëzendjpoët vanne Rabbedabbers en heet euveral ein oplossing veur!

... dèezelfdje **Sven Beelen** dit jaor weer niptj langs de titel 'Knuffelprins' heet gegrepe op het jeugdbal. Vòlgendj jaor weer ein kans, Sven!

... **Jo Brouns** oppe Zitting is oët gerope tot ridder inne Orde vanne Rabbedabbers! En det hèe ouch ziene stèek heet gehad. Dèe van Hubert waas nao zoëveul jaor al flink

verslete dus wèe hóbbe mèt het lètste bitje euro's oët ôs kas eine noëwe gekocht!

... **Sandro Paglia en Jean Meurs** ôs noëw lede zeen biëj de raad van èllef. En det wèe diëj luuj van harte welkôm heite biëj ôs vereniging!!!

Môppe

↔ **Martine van Steef Thaens, Maria van Bèr Smeets en Rina van Rièk van Café Sport** zeen aant kalle euver hun relaties en besloëte alle 3 hun manskèerels ins ferm te ver-rasse.

Ze zulle de volgendje aovendj alle 3 ein lèere pekske in SM-stijl drage, mèt hoëg hakke aane veuj en ein maskerke euver hun gezicht.

Nao ein paar daag treffe ze zich weer aan het buffèt van Café Sport.

Martine vertèldj: "Toen Steef thoës kwaam, laag ich verlei-delik in miëne lèere outfit oppe divan. Steef zag mich det ich de vrouw van zien droume waas en wèe hōbbe de hiële nacht sex gehad!"

Maria: "Ich hōb Bèr verrastj toen hēe trōk kwaam van ziëj werk, en ich haai ouch nog eine lange rēegenjas aan. Toen Bèr dēe rēegenjas oëtdeej, zag hēe gei woord. Wēe hōbbe allein super heite, hevige sex gehad, den hiële nacht door."

Rina antwoordj: "Ich haai de veurdeur vanne café geslote en laag volledig in lèer klaor inne keuken. Rièk kumtj bjus, puktj zich ei pintje oët de frigo, geit inne zèetel zitte, puktj de aafstandsbedeening vanne tillevisie en zeet: "En Bat-man, waat èete we?""

↔ **Henri Christis** geit nao **Piet de coiffeur** òm zien haor te laote knippe en zich te laote sjèere.

Hēe zeet: "Ich kin zelf miën bakkebaarde neet good sjèere, want ich hōb teveul rimpels.

"Gei probleem," zeet Piet, en hēe puktj ei klein houte belke oët ziene kast.

"Doot det mer in diëne mōndj," zeet Piet tegen Henri.

Christis duit waat Piet hum zag en zien wange kōmme sjoën glad te staon.

Es effe later Piet klaor is, zeet Henri: "Dit is de gladste sjèerbeurt diëj ich in jaore gehad hōb, mer ei bitje gevaorlik vinj ich het waal. Ich haai det belke kinne inslikke."

"Det waas toch gei probleem gewèest," zeet Piet. "Den houwe het nao ein paar daag trōk kinne bringe, det doon ze allemaol."

↔ **Jos Craegs** en **Tammy** zeen op vakansie in Jeruzalem. Op einen daag sturtj Tammy.

De begrafenisōngernummer zeet tege Jos: "Veur 5000 euro kinne wēe het liëk transportere nao Kinder, of wēe kinne uch vrouw veur 150 euro oug hiëj in Jeruzalem be-grave, en dit in heilige grōndj!"

Jos dinktj efkes nao en zeet: "Transporteer heur mer hei-vis."

"Wètse det zeker?" vreugtj de begrafenisōngernummer.

"De geufs 5000 euro oët esse 4850 euro kins bespare, én Tammy kins laote begrave in heilige grōndj."

"Loëster," zeet Jos, "hiël lang geleeje is hiëj eemes begra-ve dēe 3 daag later is opgestange. Ich gaon det risico neet pakke!"

↔ **Luc Prenen** zitj mèt **Jeroen 'Kuup' Kuypers** biëj De Limburger. Luc is ei bitje treestig en Kuup vreugtj waat ter aan de handj is.

"Jong," zeet Luc, "gisteren zaat ich mèt de vrouw nao het èete aane taofel nog get te kalle, tot inins het gesprek op euthanasiëj oëtkwaam. Biëj dit delicate òngerwerp, euver de keus tōsse lèeve en doëd, zag ich tege heur: "Laot mich noëits lèeve wiej ein plantj, det ich aafhankelik bèn van ei mesjiën en geveudj wèer mèt vloeistōf oët ein fles. Esse mich in dēe toestandj zuus, koppel den diëj apparate diëj mich in lèeve haoje mer aaf."

Ze is opgestange, heet de stekkers vanne tillevisie en de kōmpjoeter oëtgetrokke, en al miën beer oët gesjōdj. De trut!"



Opnoëw doupingsjandaal in Kinderse Kèrmiskoers!

Lance Armstrong heet get in gank gezat, det kinse waal zègge! In naovolging van het sjrappe van al zien euverwinninge is ter inne koerswèereldj ein groëwtsjaligge zuueringsoerasiej bezig. Biëj ein twiëdje en ein dördje kôntrol van het blood en de pis van alle koerôers van ôs Kinderse Kèrmiskoers, bleef ter neemes miër euver dèe volledig tot oppe graot zuuver waas. "Hiël het klassementj gesjrapjt!" zeet het UCI en USADA.

Door diëj sjraping van alle 27 deilnummers is de iëjste priës noëdgedwônge nao den innige opgèever gegange: **Geert Vandewal!** Geert is zoë toch nog, ôndanks zien gebroke këtting inne twiëdje runj, es reservewinnaar oëtgerope vanne Kèrmiskoers 2012. Proficiat daoveur!



Pé's wèerberichtstein

Mer 25 euro!!!

Hang deze stein op aan het biëjgeleverdje touw in den hoof!

Condisie vanne stein	Wèerbericht
stein is naat _____	't rëegentj
stein is druueg _____	't rëegentj neet
sjeem oppe grôndj _____	zônning
stein is wit aane bovekantj _____	sniëw
de zuus de stein neet _____	mistig
de stein geit op en aaf _____	het weidj
stein geit op en niër _____	aardbeving
stein is weg _____	tornado

Gank noeits miër ônveurbereidj de deur oët!
En det veur mer 25 euro!
Sômmige modelle zeen anders van vorm en kleur.

	Stein (40.000 B.C.)	iPhone 3 GS (2008)
MMS	X	X
Filmkes make	X	X
Videogesprek	X	X
Verwisselbare geheugekaart	X	X
Aanraaksjerm	X	✓
Geit neet kepot es het viltj	✓	X
Waterdicht	✓	X
Gein vervèelendje effecte	✓	X
Kan es waope gebruikjt wèere	✓	X



Project X Kinder mislukt volledig door taamheid Kinderse jeugd!

De ongezeene desinteresse vanne Kinderse jeugd heet ter veur gezörgdj det Project X Kinder volledig is misluktj. In Project X oppe Hollênjer hóbbe ze zoë-es gèe in het noëts höbtj kinne zeen hiël Haren nao de vaantjes geholpe. Gelökkig kwaam het in Kinder neet zoë wiëd.

Ôm ziene verjaordag te veere haaj **Kris Peeters** eine oproop op Fèejsbook gezatj ôm same te kôme op 't Dörp. Ôndanks 977 meldinge van meugelikke aanwezige, wore ter op d'n daag zelf mer 2 wuillesse oppe afspraak: **Dries Tielens** en **Pieter Vanhoef**. Al snel nao de start van het fiëstje haaje Dries en Pieter al **Hendrik Bruckers** ziene otto in de fik gezat. Gelökkig haaj **Bart Douma**, de lokale pelis, de boel snel ônger kôntrol. Hèe haaj het waterkanôn van Bree geliëndj en Tielens en Vanhoef bloze al hiël get minder hoëg vanne tore naodet ze ein paar kuub water op hun kloëte haaje gehad.



The screenshot shows a Facebook event page for 'Project X'. The event is listed as 'vrijdag 28 september 2012' at '20:00'. The description reads: 'Spread the word and just be there!!! and just like I said ; Zelf alcohol meenemen! En wat je ook gebruikt XOXO'. A map shows the location at 'Kinder' in Sloterdijk III, Noord 4. The page also features a profile picture of a smiling man and a 'Deelnemers (977)' counter.



Môppe

↪ **Ivo Theijs** vreugtj aan **Danny Kunnen**: “En Danny, wie is het mèt diëj sexlèeve?”

Danny antwoordj: “Geliëk Coca-Cola.”

“Wiëjzoë?” vreugtj Ivo.

“Waal,” zeet Danny, “iërst waas het lekker, daonao woor het light en noëw is het zero...”

↪ Inne iërstegraadsjoëwl van Kinder zitte ter muus in het archief. **Jaak Tielens** kumptj same mèt de raad van beheer òm het probleem te besprèeke. Dao weurdj beslote òm ein kat aan te werve. Ein paar maondj later is de situatie al fel verbèeterdj.

Ettelikke jaore later weurdj ter weer geklaagdj euver muus int archief. **Lisbeth van Wout Hoeken** vreugtj aan Jaak: “Mer directeur, wèe hóbbe ei paar jaor trök toch ein kat aangepaktj?”

“Jao,” zeet Jaak, “mer diëj is òngertösse vastbenumdj...”

↪ **Ellen van Kaj van Ton van Kimmenade** beltj **Kaj** op ziene gsm. “Awaal, kloët, woë zits dich noë?!?”

Kaj antwoordj: “Waal, sjatteke, herinnerse dich dèe juwelier nog hoë desse lang geleeje dèe diamante ring zoogs dèe desse zoë gèer wouws hóbbe?”



Ellen begintj al ein bitje te giechele en zeet zaocht: “Jao, det weit ich nog, leeveling.”

Kaj: “Ich zit in de café ter langs!”

↪ **Lei van de Limburger** en **Raf Smeets** zeen op het ge-maak aant vèsse aan de Goërt mèt get pintjes terbiëj.

Insins zeet Lei: “Ich dink det ich gaon sjeije vanne vrouw. Ze heet al twië maondj niks miër tege mich gezag.”

Raf dinktj nao, drinktj ins van zien pint en antwoordj: “Dink ter toch mer ins good euver nao, Lei. Zoë ‘n vroluuj zeen meuilik te vinje...”



Fritchinees Kinder goodgekeurdj!

Kinder haaj toch mer weer fijn ziene eige fritchinees veur det det woord inne Dikke Van Dale stóng. Benny Bax, dèe normaal gezeen hiël nót is op zoë ein zake, kwaam en zaag det 't good waas! Ouch de Rabbedabber zeen al ins oëtgebredj gaon dinere en hóbbe zich te good gedaon aan al det lekkers. Welkóm in Kinder, fritchineeskes!!!

Bosmans & Co koupe groëwt deil van 't Dörp op oët gift

Al hiël lang waas het 'Moubax-driëjheukske' langs de vreugere Senolkebab het ideale plèetske veur **Roel Bosmans** òm zien hundje te laote sjiëte. Tot den daag det hèn tege ei ferm proces aanleep! "Gèe laot ugge hõndj kakke op privaat terrein, meniër!" aldus **Bart Douma**. "Nèenèe, det is het driëjheukske van Moubax, ich maag miën hundje hiëj laote kakke," zag Bosmans. 't Hooldje niks oët, want de pelis sjreef drek ei proces oët.

Bosmans ging heivis, houldje zien spaarverkske kepot en teldje zien cente. Ei paar daag later waas alles al in kanne en kruuke. Den driëhook van Moubax stuit op Roel Bosmans ziene naam! Vanaaf noë kaktj ziene hõndj hiëj perfect legaal!

Ômdèt Roel nog ei bitje geldj euver haaj, heet hèn in eine kiër ouch den ouje kebab opgekocht. Vant momentj det de heurders van dit toch waal prachtig pandj hunne tispel ingelaaie hõbbe en angere oorde opzeuke, kintj Bosmans beginne mèt de herinrichting. De planne zeen òndertösse al bekintj. Roel geit eine coiffeur veur hunj beginne. Ein klassezaak diëj den hõndj centraal plaatstj. Wèe dinke det dit waal ins ei geweldijg succes zal wèere en winse Roel alvast veul gelòk mèt de noëw zaak.



Môppe

↔ **Jan Moubax** weurdj 90 jaor. **Jos** geuftj ei groëwt fiëst veur hum. Hèn vreugtj: "Pa, hõbtj gèe nog ein wins?" "Jao," zeet Jan, "es ich doëd gaon wil ich gecremeerdj wèere."

"Ok," zeet Jos, "det regel ich veur uch. Mer hõbtj gèe niks angere te winse?"

"Jao, es ich den gecremeerdj bèn, môtj gèe miën asse euver de parking van den Aldi struije," zeet Jan.

"Den Aldi? Woëveur de parking van den Aldi, pa?" vreugtj Jos.

Jan : "Den bèn ich zeker desse ein of twië kieër inne wèek ins langskums..."

↔ **Pé Fiddelèers** en **Pé Theijbers** zitte op de lèzere Man in Wieërt vanoët eine boët te vèsse. Ze vange veul vès. Pé Theijbers zeet: "Dju, Pé, dit is ein gooi plaats. Die zouwe wèe môtte markere."

"Det is ein good gedacht," zeet Pé Fiddelèers, en hèn zètj ein groëwt kruus achter oppe boët.

Ein paar oor later vare ze tròk nao de kantj. Inins zeet Pé Theijbers tege ziene maot: "Toch neet zoë slim van det kruus. Wèem zeet det wèe volgendje wèek dezelfde boët weer hõbbe?"



Dônderdig 7 fibrewariej 2013
Dialectoëtzending
radio Monza
Van 16 tot 22 oor

Zôndig 10 fibrewariej 2013
37^{ste} stoet
Vanaaf 14 oor

Maondig 11 fibrewariej 2013
Verklèdj bal
inne fanfarezaal
Gratis inkom
Vanaaf 20 oor

Wistj gèe det ...

... 11 jaor geleeje **Albert Royakkers** en **Christa Weltjens** ôzze groëwte Prins en Prinses wore? Det jaor wore **Maarten Royakkers** en **Lieve Knippenberg** het Jeugdprinsepaar van Kinder!

... 22 jaor geleeje **Freddy Janssen** en **Sabien Poelmans** hun Prins- en Prinsessejaor belèefdj hóbbe, same mèt Jeugdprins **Angelo Urlings** en Jeugdprinses **Cindy Nies**.

... 33 jaor geleeje het het jaor van Prins **Gerard Bullen** waas. En det Gerard det jaor mèt **Stefan Cuypers** eine geweldige Jeugdprins nêeve zich haai.

... ôzze Vorst **Mark Hoedemakers** dit jaor ziene 3 x 11dje verjaordaag veertj. En det mèt anger weurd de iërste mid-laaifkrisis oppe loor ligtj...

... **Marc van Hover** zich likstein veur zien hoonder heet aangesjafdj! Woërom weite wèe ouch neet, mer Marc zelf zal hiëj vast en zeker eine gooie oëtlèg veur klaar hóbbe...

... het oppe zitting weer oppe köp loupe waas! Den ambiance waas top en het volk waas super!

... wèe op diëj zitting veur ôs godfathers **Pool Frit**, **Jean Knip** en **Jan Linssen** ei speciaal balkon haaje gezat van woë-op ze ei prachtig zicht op het hiël gebeure haaje.

... ex Prins **Dirk Bogie** ein kepotte koew kintj doon lache.

... **Guy Martens** van de geliëknamige bekkeriëj dankzij ôs Google Straotzicht foto van veurig jaor eine belastingskôntroleur euver de vloer heet gehad? Det heet hum hiël get pateekes gekostj!

... **Miel Vandewal** de hiëre van KDR en de Hemelzoëpers oppe zitting aardig heet getrakteerdj es dank veur de gratis reklaam?

Môppe

➔ **Gunther Leenders** leutj ein hoës boëwe. **Geert Dirx** môt het ôntwerpe.

Geert vreugtj aan hum wiëj het hoës ter oët môt zeen.

Gunther antwoordj: "Rôndj!"

Geert: "Jao, mer Gunther, wiëj môt biëjveurbeeldj dien living ter oët zeen?"

Gunther: "Rôndj."

Geert: "Mer Gunther, ich begriëp dich neet good. En dienen WC den?"

Gunther: "Rôndj!"

Geert: "En diene gank?"

Gunther: "Rôndj, rôndj! Alles môt rôndj zeen!!"

Geert: "Mer Gunther toch, det is toch neet te realisere? Wiëj kumse dao biëj?"

Gunther: "Waal, ich huuërdje gistere sjoënmooijer tege de vrouw zègge: "Es gèe den toch opnoëw gaotj boëwe, den kintj gèe toch waal hiëj of dao ein heukske vinje woë ich kan woëne?"

➔ **Tom Prenen** stoptj biëj de Keij ôm te tenke. Dao hingtj ein groëwte affiesj oët: 'Win gratis sex biëj 't vôle vanne tenk.'

Prenen vòltj zien tenk, geit nao binne en vreugtj nao ziene gratis sex.

"Ok," zeet de Keij. "Kees ein cijfer tösse 0 en 10."

"7!" zeet Tom.

"Det waas nipt. Het waas 8 en volgendje kiër missien miër gelök!"

3 wèeke later stoptj Tom weer biëj de Keij mèt **Raf Smeets**. Hèe tenktj vol en geit weer nao binne.

"Gèef mich mer ein cijfer tösse 0 en 10," zeet de Keij opnoëw.

"2!" antwoordj Tom.

"Helaas, het waas 4. De woors ter weer kortbiëj. Bliëve probere zou ich zègge," aldus de Keij.

Tom en Raf vertrèkke en Raf zeet: "Volges mich is det hiëj dik bedrog, en geuftj dèe Keij noëits gratis sex. Hèe wiltj allein mer miër naft verkoupe..."

"Toch neet," zeet Tom, "**Evelien** heet hiëj al 3 kiër gewônne!"



Verantwoordellikke oëtgèever: vzw KVRK, 3640 Kinder.

Dit Rabbedabberke is gedròktj biëj Dròkkeriej Hugo Symons in Bree. De leejout is gemaaktj door Ria Froidmont, dèt werktj biëj dròkkeriej Symons.